

1:7 (Mokanda Na Bomoi)

“NKÓLO azali malamu, azali ndako ya kokima na mokolo ya pasi; ayebi baoyo bakimaka epayi na Ye.”

Nazali koloba na yo, yo oyo osali Nzambe azala eteni mobimba ya bomoi na yo kozanga lokuta to bilongi mibale. Yeba ete Nzambe azali komona yo. Yo oyo okómisi Ye elikya na yo ya suka, Nzambe azali komona yo. Yo oyo obimisaka ntango na yo mpo na kokanisa Ye, kolukaluka makambo na Ye, mpe kosala mosala na Ye kozanga kotala esika ozali to makambo ozali kokutana na yango. Yo oyo omipesi na koluka boyebi na Ye kozanga kolemba, atako bato mosusu bakoki kokanisa ete ozangi mayele to ozali kobebisa ntango... yeba ete Nzambe ayebi yo malamu penza.

Ata mokili ekoki komona lokola obungi, to bandeko bakoki koboya yo, to baninga bakoki kokabwana na yo mosika penza... yango ekoki kosala te ete Nzambe amona yo te. Azali komona yo koleka ndenge yo moko okanisaka.

Na mikolo oyo ya suka, ezali pete komona moto nyonso—ata molangwi masanga, to mosali pite, to mwasi alataka bilamba ya mike—koloba: “Nzambe azali esika na ngai ya kokima.” Mosusu azali mosaleli malamumu na lingomba, ayembaka na kwaya, azali mokambi ya bilenge to ya basi... kasi na motema na ye azali kotala bililingi ya mbindo mpe kosala masumu; ata ye akoloba: “Nzambe azali esika na ngai ya kokima.” Moto nyonso akoki koloba bongo mpo ezali kaka maloba ya pete. Kasi Nzambe alobi: Ngai nayebe baoyo bakimaka epayi na Ngai.

Esengeli te ofanda mpo na kosimbola Ye nyonso na mabondeli, to koyembela Ye banzembo ya kitoko mpe koloba: “Yo Nzambe ozali esika na ngai ya kokima,” to kosakola yango epayi ya bato nyonso. Yango moko epesaka yo te lokola elembo ete okimi epayi na Ye. Kasi misala na yo nde ekoloba mpo na yo liboso na Ye. Epai na Ye politiki ezali te; azali komona motema.

Kasi nalingi nayebeba yo ete ezali na litomba monene mpe mbano monene mpo na yo oyo ozali koluka Nzambe na makasi na yo nyonso. Ekoya mokolo—ata awa kaka na mokili—okosepela mpe okobondisama mingi, liboso kutu okende na likoló, soki otiki motema te.

31:19-20 (Mokanda na Bomoi)

“Oh, boboto na Yo ezali mingi penza, oyo obombeli baoyo babangaka Yo, oyo osaleli baoyo bakimaka epayi na Yo na miso ya bato!

Okobomba bango na se ya mapapu na Yo mpo na kobatela bango na mabongisi mabe ya bato; okobomba bango na ndako na Yo mpo na kobatela bango na bitumba ya maloba.”

Yango wana, kolemba te. NKÓLO ayebaka tango nyonso baoyo bakimaka epayi na Ye.

Nzambe apambola yo.

Share on:
WhatsApp